



**Les Fleurs Des Vies Des Saints Et Des Festes De Toute  
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromeo, & de Sainte Françoise ; Avec le Martyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

XX La vie de saint Eueurt Euesque d'Orleans, Confesseur.

---


[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

18. **FEV.** croix, comme il fit, imitant nostre Seigneur Iesus-Christ, qui estoit mort pour luy en vne autre Croix. Il fut martyrisé le 18. de Feurier, auquel iour la sainte Eglise celebre sa feste l'an de nostre Seigneur 109. de l'Empire de Trajan. Nicephore Calixte escriit le martyre de ce saint, & le Martyrologe Romain, & autres font mention de luy.

*En Hierusalem saint Simeon Euesque, cousin de nostre Sauueur selon son humanité, & fils de Cleophas, ayant esté sacré Euesque de ladite ville apres saint Iacques, surnommé le frere de nostre Sauueur, fut diuersement affligé durant la persecution de l'Empereur Trajan, & finalement crucifié, avec un merueilleux estonnement de tous ceux qui le virent, & du Iuge mesme, lequel ne se pouuoit assez esbahir de ce qu'un vieillard âgé de six vingts ans auoit peu endurer si constamment le supplice de la Croix. A Ostia ville sur l'emboucheure du Tybre decederent les saints Maxime, Claude, Prapadigne sa femme, & leurs enfans Alexandre & Cutia, lesquels quoy que Gentils-hommes de bon lieu, furent par le commandement de Diocletian. enuoyez en exil, & puis brulez s'offrirent en tres-doux sacrifice à Dieu, leurs cendres furent retrees dans la riuiere, & leurs reliques enseuelies par les Chrestiens pres de la susdite ville. En Afrique moururent les SS. Martyrs Lucie, Syluain, Rutule, Clasique, Secundin, Fruenle, & Maxime. A Constantinople S. Flavian Euesque, defendant à Ephese la Foy Catholique, fut depose par un certain Conciliabule tenu en ladite ville, de quoy se portant pour appellant au Pape Leon lors seant à Rome, fut tellement traité à coups de pieds & poings par ses aduersaires, qu'il en mourut trois iours apres. A Tole saint Helladie Euesque & Confesseur.*

19. **FEV.** *A Rome deceda S. Gabin Prestre, frere de S. Caie Pape, lequel ayant esté long temps detenu en prison par le commandement de Diocletian, acquit par mort la gloire eternelle. En Affrique les saints Publie, Julien, Marcel, & autres. En Palestine la commemoration des SS. Moines & autres Martyrs, lesquels sous le Capitaine Alamundare furent cruellement meurtis par les Sarrazins. A Solos mourut S. Auxibie Euesque. En Hierusalem S. Zambde Euesque. A Beneuent S. Barbat Euesque, homme de grande sainteté, lequel conuertit à la Foy les Lombards avec leur Capitaine. A Milan S. Mansuet Euesque & Confesseur.*

LA VIE DE SAINT EVVERT,  
Euesque d'Orleans, & Confesseur.

20. **FEV.**  E bien-heureux saint Eueert (& selon le martyrologe, Eucher) nasquit à Orleans, de parens nobles, riches & pieux : sa mere estant enceinte de luy, comme elle retournoit vne nuit de l'Eglise où elle auoit oüy Matines, apres qu'elle se fust couchée dans son lit, elle aperceut vn homme resplendissant, blâc & venerable, les yeux vifs comme des rayons du Soleil, qui luy dit : Dieu vous garde, la bien-aymée de nostre Seigneur Iesus-Christ, qui portez en vostre ventre vn fils qui sera Euesque de ceste ville, lequel nostre Seigneur Iesus-Christ a choisi pour cet effect. La bonne mere resiouie de ces paroles, cogneut que c'estoit vn Ange du Ciel, & le pria de benir la creature qui estoit dans ses entrailles.

L'Ange disparut soudain, & elle raconta sa vision à son mary, dont ils remercièrent tous deux nostre Seigneur, attendans l'heure de son accouchement, & l'issuë de ceste reuelation. Eueert

nasquit à terme, & ses parens le regardâs comme vn enfant doié de Dieu, le firent baptiser par vn saint Euesque nommé Aubert. Ils le mirent à l'estude en l'age de sept ans, où il profita tellement qu'il surpassoit tous ses compagnons, tant il estoit habile, docile & laborieux. Mais encore qu'il fust doié des graces naturelles, dont le monde fait tant de cas, l'ornement de son ame estoit bien autre chose, nostre Seigneur l'ayant enrichié de rares & excellentes vertus. Eueert le fit assezt paroistre en la resolution qu'il prit de fouler aux pieds toutes les choses terrestres, & faire banqueroute au monde, afin d'embrasser à nud la Croix de Iesus-Christ. Il se rendit Religieux au Monastere de Lumiege, où il pratiqua tous les exercices de la perfection Monastique.

La lumiere de sa sainte vie esclatta tellement, & chacun auoit vne si bonne opinion d'Eueert, que son oncle Sauarie Euesque d'Orleans, estant decédé, le peuple d'vn commun consentement enuoya vn solemnel ambassade vers Charles Martel, qui gouuernoit tout à fait le Royaume de France, en qualité de Maire du Palais, pour le supplier de leur donner Eueert pour leur Euesque ; ce qu'il fit. & depescha vn de ses Gentils-hommes, là où il estoit, avec charge de l'en tirer, bon gré, mal-gré, pour le faire sacrer, & establir dans ce siege vacquant. Le ne scaurois assez exprimer l'ennuy qu'en receut Eueert, les larmes qu'il icetta, voyant qu'on le vouloit faire Euesque, non seulement à cause qu'il s'estimoit indigne d'vne si haute dignité ; mais aussi parce qu'ayant fuy les perils & tempestes du monde, se retirant dans le port assure de la religion, on le força de retourner, dont il pensoit estre eschappé, & s'embarqua de nouveau à de plus dangereux orages. Neantmoins il obeit en pleurant, & ses confreres avec luy, & sortit hors du Monastere pour venir à Orleans, où il fut sacré par les Euesques, & mis en possession par tout le Clergé, & le peuple avec vn merueilleux applaudissement, chacun remerciant nostre Seigneur, qui leur auoit donné vn si noble Prelat.

Le saint commença à exercer l'office de Prelat avec vn grand soin & vigilance, estimant que ce luy estoit vne charge veritablement plus onereuse qu'honorable. Il mettoit peine que les Eglises fussent bien ornées & seruies, que le Clergé par sa vie exéplaire, monstret le chemin aux seculiers, & que le peuple fust instruit en la Loy de Dieu, que les vices fussent corrigez, les vertus augmentées, les œures de pieté pratiquées, & que les monasteres des Religieux (qu'il visitoit & fauorisoit particulièrement) fussent autant d'academies des vertus. Sa doctrine, sa prudence, sa mansuetude & benignité le faisoit honorer & reuerer d'vn chacun, comme vn pere commun, duquel on publioit les loianges de toutes parts. Neantmoins tout cela n'empescha pas que le S. Euesque ne souffrist beaucoup, & ne fust calomnié, de quoy il s'acquittoit si exactement de son deuoir. Charles Martel estoit vn Prince qui couuoit de hauts desseins, disposant de la France à sa volonté : il eut de fortes guerres, tant contre les Regnicoles,



20.  
FEV.

que contre les Mores & Sarrazins, qui s'estoient coulez d'Espagne plus espais que mouches, iusques à la riue du Loire. Il fallut trouuer de l'argent pour soustenir les frais de la guerre. Martel empoignant ceste occasion, s'empara de sa propre autorité des plus beaux reuenus de l'Eglise, & se mesloit de pouruoir aux Eueschez & Prelatures, dont saint Eueert le voulant blâmer & reprendre, parce qu'il abusoit des biens de l'Eglise, comme si c'eust esté son propre: Martel s'en offensa cruellement, d'autant que les Princes trop pleins de leurs volonteés ne peuuent souffrir qu'on s'oppose à ce qui leur plaist: il se rencontra avec cela des flatteurs auares, qui incitoient Martel à punir Eueert, le priuant de l'Euesché qu'il luy auoit donné, & de le bannir luy & les siens de la ville d'Orleans. Martel dissimula pour vn téps, ayant la guerre des Mores sur les bras: mais apres la glorieuse victoire qu'il en remporta en Touraine, il deuint si superbe & contumax, qu'il executa ce qu'il auoit auparauant proietté, enuoyant le saint Euesque en exil à Cologne, où il fut si bien receu, que Charles Martel, qui le redoutoit, l'enuoya au Duc Robert son amy, pour le garder & contenir. Robert sçachant bien le merite d'Eueert, le cherit à merueilles, & le fit son grand Aumosnier, pour distribuer ses finances aux pauvres: mais le saint ne desira autre grace du Duc, sinon qu'il peust seruir librement dans l'Eglise de saint Trudon, & prier Dieu pour la prosperité du Duc & des autres, ce qui luy fut octroyé: & le saint oubliant toutes les sollicitudes terrestres, s'occupoit à l'oraison & contemplation, passant la plus part du temps en l'Eglise à remercier Dieu, dequoy il l'auoit deliuré del'Euesché d'Orléans qu'il luy auoit auparauant imposée, & fait naistre l'occasion de souffrir pour la iustice, & meriter quelque chose en sa presence.

Le saint Prelat passa six ans en exil, au bour desquels nostre Seigneur Iesus-Christ le voulant liberer, & de celuy de tous les enfans d'Adam qui est beaucoup plus rude: luy enuoya vne maladie, qui le rangea au port du voyage de ce monde, & son ame liberée de la prison corporelle, vola au Ciel, pour receuoir la recompense de ses trauaux. Son corps fut enterré en l'Eglise de saint Trudon, en grande solemnité. Nostre Seigneur Iesus-Christ l'illustra de plusieurs miracles apres sa mort, qui sont contenus dans l'histoire de sa vie. Entr'autres, les cierges que les fidelles mirent par deuotion sur sa sepulture, brusloient iour & nuict sans se consumer; l'huile des lampes s'augmenta & multiplia tellement, que d'vne lampe on en remplit sept autres, qui demeueroient tousiours allumées, sans que l'huile se diminuast; & les malades qui estoient frôtez de ceste huyle par la main d'un Prestre, guarissoient. Vn cierge de la pesanteur d'un homme estant tombé la nuict sur le drap mortuaire qui couuroit le tombeau de S. Eueert, ores qu'il fust quasi bruslé, ne s'estât point esteint, ne fit aucun dommage au drap, ores que sa flamme y touchast. Vne autre fois plusieurs personnes estant venuës à la feste du saint, & l'Abbé du Monastere de saint Trudon, n'ayant

dequoy les traiter, nostre Seigneur le fournit miraculeusement de tant de poisson qui fut pris en vn coup de reys, qu'il y en eut à suffire pour les seruans, & les autres. Dauantage, plusieurs auengles y recouurerent la veuë, les boiteux en reuenoient marchans bien droict, les malades y trouuoient fanté, & les demoniacles estoient deliurez par l'intercession de saint Eueert.

Pendant son exil, comme il estoit en oraison, il luy arriua vne chose estrange, qui est remarquée dans sa vie, que j'ay bien voulu raconter. Il pensa voir vn Ange qui le conduisoit en l'autre vie, où il vid plusieurs choses, & entr'autres Charles Martel qui estoit tourmenté en enfer. S'enquist de la cause, on luy dit que c'estoit à cause des violences qu'il auoit faites aux Eglises, en vsurpant les biens, mesmement les dixmes qu'il distribuoit à ses soldats, au grand preiudice des Curez, qui en sont encores à present desnuez. Saint Eueert estant reuenu à soy fit part à saint Boniface (qui fut depuis Archeuesque de Majence, & Martyr) ensemble à l'Abbé de S. Denys (qui estoit grand Aumosnier du Roy de France) de sa reuelation, & leur dit, qu'ils ouurissent le tombeau de Charles Martel, & que s'ils n'y trouuoient plus son corps, ils pouuoient croire qu'il leur auoit fait sçauoir la verité. Ces deux ouurirent le sepulchre de Martel, duquel sortit vn serpent, & le dedas estoit tout noircy, & comme bruslé; ce qui les confirma en l'opinion qui en auoit desia esté diuulgée partout. La vie de saint Eueert a esté escripte par vn Auteur qui supprime son nom, laquelle est rapportée au premier Tome de Surius, & en la vie de saint Rigobert Archeuesque de Rheims, il est parlé de ceste reuelation: & Paul Emile au second Liure de l'Histoire de Frâce le rapporte, comme vne chose certaine; & dauantage, elle est contenue tout au long dans le decret, ayant esté enuoyée au Roy Louys par les Euesques des provinces de Normandie & Champagne. Dans le nouveau decret que Gregoire VIII. fit reformer, la mesme reuelation y est enregistree. Mais c'est la verité que le Cardinal Baronius au neuuesime Tome de ses Annales, tient ceste Histoire fort suspecte, & prouue par plusieurs raisons qu'elle est fabuleuse, entr'autres que S. Eueert de ceste l'an de nostre Seigneur trois cens septante & vn, dix ans deuant Charles Martel, qui mourut l'an 741. mesme que Jean Molan escript que saint Eueert trespassa dès l'an sept cens vingt-sept, quatorze ans auparauant Charles Martel. Cela estant ainsi, Eueert ne peut voir en enfer vne ame encore viuante au monde, ny prendre pour vn argument certain de ceste reuelation, qu'on n'eust point trouué dans le tombeau le corps de celuy qui vescu long temps apres. Il ne faut pas pourtant douter que nostre Seigneur n'ait rigoureusement chastié plusieurs qui ont mis trop hardiment les mains sur les biens de l'Eglise, dont nous auons assez d'exemples, non seulement parmy les Chrestiens, mais aussi entre les Gentils: & combien que Charles Martel eust merité pour ceste faute & plusieurs autres vne rude punition, neanmoins il est à presumer que ses bonnes ceures

20.  
FEV.21.  
FEV.22.  
FEV.

20. FEV. pretaurent, & que les peines & douleurs qu'il souffrit en sa dernière maladie, expierent ses pechez, ainsi que nous laissons à penser au iudicieux Lecteur. Le Martyrologe Romain fait mention de saint Euert Euesque d'Orleans, le vingtiesme Feurier, & Sigisbert en sa Chronique l'an septens vingt-trois. Molan, & ceux dont nous auons parlé cy-dessus.

*ATyr ville de la Phenice la commemoration de plusieurs Saints Martyrs, le nom & nombre desquels est conneu à Dieu seul. Ce sont ceux lesquels durant la persecution de Diocletian furent en diuerses façons massacrez par Feurie Maistre de Camp. Car en premier lieu ils furent deschirez à coups d'estripiers par tout le corps, puis exposez à plusieurs bestes sauvages de diuerses especes, lesquelles toutes fois ne les oserent toucher: en fin les uns furent bruslez, les autres passerent par le fil de l'espee. Tyranion, Syluain, Pelous, & Nil Euesques, & Zenobe Prestre apres auoir excité toute ceste multitude à la victoire, furent eux mesmes martyrissez avec les autres. En l'Isle de Cypre decederent les SS. Potamie & Nemesie Martyrs. A Constantinople saint Eleuthere Martyr. En Perse saint Sadoth Euesque, avec autres six vingts & huit, lesquels sous le Roy Sapores, faisant refus d'adorer le Soleil, furent cruellement tourmentez, & inhumainement mis à mort. A Catanie ville de Sicile trespassa saint Leon Euesque, renommé pour ses vertus & miracles. A mesme iour mourut aussi S. Encher Euesque d'Orleans, qui fit d'autant plus de miracles, que les enuieux luy mirent sus plus de calomnies. A Tourmay S. Eleuthere Euesque & Confesseur.*

21. FEV. En Sicile moururent septant-neuf Martyrs, lesquels sous Diocletian meriterent de recevoir la Couronne & recompense de leur confession par plusieurs & diuers tourmens qu'il leur fit endurer. A Machomette ville d'Affrique, les SS. Verale, Secundin, Siricie, Felix, Seruile, Saturnin, Fortuné, & autres seize, lesquels durant la persecution des Vandales recourent la Concoune du martyre. A Scythopolen Palestine saint Severian Euesque & Martyr. A Damas S. Pierre le Maumien, lequel estoit malade, comme il disoit aux Arabes qui le visitoient: Tous ceux qui n'embrassent la Foy sainte, Chrestienne & Catholique, sont damnez, comme vostre faux Prophete Mabomer, fut par eux tué. A Ravenne saint Maximian Euesque. A Metz S. Felix Euesque & Confesseur. A Bresse saint Patrice Euesque & Confesseur.

LA CHAIRE DE SAINT PIERRE en Antioche.



22. FEV. A sainte Eglise celebre la Chaire de saint Pierre en Antioche, le vingt-deuxiesme de Feurier, pour nous declarer le bien-faict que tout le monde receut en l'institution de la Chaire Apostolique, & en la puissance que nostre Seigneur Iesus-Christ donna à saint Pierre, quand il le fit son Vicaire, & la pierre fondamentale de l'edifice de l'Eglise, comme nous auons dit en la feste de la Chaire de Rome du mesme Prince des Apostres, le dix-huitiesme iour de Ianuier. Ce qu'il y a de particulier à remarquer en ceste feste d'Antioche, c'est qu'apres que nostre Seigneur Iesus-Christ eut monté aux Cieux, incontinent le glorieux Apostre saint Pierre commença à exercer son office de Pasteur vniuersel, & chef de toute

l'Eglise, premierement en Hierusalem, en toute la Iudée, presidant es Conciles, comme quand il proposa aux Apostres & Disciples de nommer vn autre en la place de Iudas, & parlant tousiours comme la langue des autres, preschant & cōuertissant tant d'ames à nostre Seigneur, faisant tant & de si grands miracles, visitant & encourageant tous les fideles de ces prouinces là. Cela faict, il passa en Syrie, & entra en la ville d'Antioche, qui estoit la capitale des autres; ou combien qu'au commencement il souffrist plusieurs grandes tribulations, estant mocqué, affronté, emprisonné, & persecuté de ceux qui estoient ennemis de la lumiere & de la verité: neantmoins apres qu'ils eurent receu la doctrine, & fortis de l'aveuglement & ignorance en laquelle ils estoient, ils l'honorèrent & estimerent, & bastirent vne Eglise au vray Dieu, dans lequel ils mirent le siege & la Chaire, dans laquelle le saint Apostre preschoit & s'asseoit. Il y en eut tant qui se conuertirent par sa predication, & celles des saints Apostres, Paul & Barnabé, que les fideles prirent premierement là le nom de Chrestien, qu'on appelloit auparauant Disciples: & d'autant que saint Pierre mit son siege en Antioche, & y declara plus son autorité, que les fidelles le venoient consulter là de leurs doutes & difficultez, encore qu'il ne fust pas tousiours dans la ville, parce qu'il estoit qualifié de Pasteur vniuersel, il visitoit les autres Eglises, on institua ceste feste de la Chaire sainte Pierre, pour memoire (comme nous auons dit) d'un signalé bien-faict. Saint Pierre fut sept ans en Antioche, au bout desquels par ordonnance & reuelation diuine, il transféra son siege Apostolique en la ville de Rome, qui estoit la Dame de tout le monde, la Maistresse des superstitions & tromperies: elle seule, comme dit le Pape saint Leon, contenoit en soy, & embrassoit pour dieux tous les monstres qu'és autres prouinces l'aveuglé Paganisme adoroit: afin que la nouvelle lumiere de l'Euangile qui venoit du Ciel, esclatast dauantage en ce profond abyssme d'obscurité, & que la teste estant gagnée, & le Palais de l'Empire Romain, le reste fust plus facile à conquerir: & nostre Seigneur Iesus-Christ qui fut déclaré Roy des Iuifs Grecs & Latins, au tiltre qui fut mis en ces trois langues sur le glorieux estendart de sa Croix, ordonna que le Prince des Apostres saint Pierre cōme son Vicaire en terre, embrassast par sa predication ces trois nations, & en elles toutes les creatures du monde, & qu'il preschast premierement aux Iuifs, puis apres aux Grecs, & finalement aux Romains & Latins, afin qu'on sceust qu'il estoit Pasteur vniuersel de tous, & que ses successeurs le sont aussi. De ceste solemnité fait mention saint Ignace, en l'Epistre qu'il escriit aux Magnesiens, & Yves Euesque de Chartres en vn Sermon, & le Concile de Tours, lequel se celebra du temps du Pape Pelage, en fait mention, & auparauant tous ces Autheurs, saint Clement Pape au 10. liure de ses recognitions, traite de ce qui arriva à S. Pierre en Antioche.